

## **Aruachön Toropwe seni Johannes**

*Kapas akom*

**I. Chon makkei ei toropwe: Ewe soukünö Johannes.**

**II. A mak ngeni iö: Ngeni eman Finesamol mi Fil me nöün kana.**

**III. Itelapemongen ei toropwe: Let me Chen.**

**IV. Kapas aüch<sup>ean</sup> ei toropwe: Souläng resap chiechi ngeni ekewe chon afalafal chofona.**

**V. Masouen ei toropwe: Ewe aruachön nöün Johannes toropwe a mak me ren ewe “Souakom” ngeni ewe “Finesamol mi Fil me nöün kana”.**

**Eli ekei kapas ra wewe ngeni eu mwichefel me aramasen lon. Malapen ei pworaus eu tün<sup>gor</sup> pwe souläng repwe tongfengen lefiler, pwal kapasen fön pwe repwe ü ngeni ekewe chon afalafal chofona me masouen ar afalafal.**

**VI. Tettelin masouen ei toropwe:**

Kapas akom 1-3

Aüch<sup>ean</sup> ach eäni chen 4-6

Kapasen fön usun ach sipwe ü ngeni ekewe chon afalafal chofona 7-11

Kapasen lesopolan 12-13

*Kapong*

1-3

<sup>1</sup> Ngang ewe Souakom üa kapong ngeni ewe Finesamol mi fil me nöün kana, ir chokewe üa wesewesen echeniir. Nge sap ngang chök üa

echeniir, pwe pwal chokewe meinisin mi silei ewe let,

<sup>2</sup> pun ewe let a nonom loch, epwe pwal etikich tori feilfeilachök.

<sup>3</sup> Samach Kot me Jesus Kraist, i Nöün ewe Sam, epwe ngenikich ümöümöch, tong me kinamwe, repwe nonom rech lon let me chen.

*Let me Chen*

*4-11*

<sup>4</sup> Üa fokun pwapwa lupwen üa silei pwe ekoch me lein noumw kana ra manaueni ewe manauen let usun chök ewe Sam a allük ngenikich.

<sup>5</sup> Iei üa tüngor ngonuk achengicheng Finesamol: Ousipwe echenifengenikich lefilach. Ei esap eu allük mi fö üa makkei ngenikemi, pwe iei eu allük sia eäni seni chök lepoputän. ✧

<sup>6</sup> Ei chen üa kapas usun, wewen pwe sipwe fokun aleasochisi än Kot kewe allük. Iei ewe allük oua rongorong seni lepoputän, pwe oupwe manaueni ewe manauen chen.

<sup>7</sup> Chomong chon atuputup ra fetalfeil won un-usen fanüfan, ir aramas resap pwärätä pwe Jesus Kraist a feito o wiliti aramas. Ei sokun aramas eman chon atuputup me ewe pölüen Kraist.

<sup>8</sup> Iei mine oupwe mamasakemi, pwe esap pöüt senikemi mine sia angang fän itan, nge oupwe angei ewe liwin mi unus.

<sup>9</sup> Eman esap kamwöchünük won än Kraist afalafal, pwe a apacha och ngeni, Kot esap nonom ren. Nge eman mi kamwöchünük won ewe afalafal, ewe Sam me ewe Nau ra nonom ren.

---

✧ 1:5: Joh 13.34; 15.12,17

<sup>10</sup> Iei mine are eman a feito remi nge esap uwato ei afalafal, ousap etiwa i lon imwemi, ousap mwo nge apasa lon ämi kapong, “Kinamwe epwe nonom reöm.”

<sup>11</sup> Pun eman mi eäni kapongen kinamwe ngeni, a wiliti eman chiechian lon ekewe sokun föföringau a föriir.

*Kapasen lesopolan*

*12-13*

<sup>12</sup> A wor chomong mine ngang üa mochen ürenikemi, nge üsap mochen makkei ngenikemi lon toropwe ren ink. Nge üa apilükülük ngeni ai üpwe tongeni churikemi o püsin kapas ngenikemi, pwe ach pwapwa epwe unusöch.

<sup>13</sup> Nöün pwiüm we mi fil ra kapong ngonuk.

**Paipel**  
**The Holy Bible in the Chuukese language of the**  
**Federated States of Micronesia**

copyright © 1984, 1989, 1991, 2001 Liebenzel Mission

Language: Chuukese

Translation by: Liebenzell Mission

Old Testament © 1989, 2001 Liebenzel Mission New Testament © 1984, 1991  
Liebenzel Mission

This translation is made available to you under the terms of the Creative  
Commons Attribution-No Derivatives license 4.0.

You may share and redistribute this Bible translation or extracts from it in  
any format, provided that:

    You include the above copyright and source information.

    You do not make any derivative works that change any of the actual  
    words or punctuation of the Scriptures.

Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2024-01-24

---

PDF generated using Haiola and XeLaTeX on 18 Apr 2025 from source files  
dated 24 Jan 2024

c48fd7-5e91-508c-a792-018261cf838c